

## Brev e mes commembers en vischnaunca (1)

Mes cars amitgs,

L'erupziun dil virus da corona ei la pli gronda provocaziun che ha tuccau ils biars da nus en nossa veta. Malgrad tuttas resursas e las progressivas tecnologias sesentan ils carstgauns piars viers quella pandemia. Ella muossa nossa rumpeivladad da nossa veta e che nus essan buca ils patrums digl univers. Il meglier che nus savein far ei da realisar e capir la situaziun e far il meglier ordlunder. Nus enconuschein il verset che di che mintga nebla stgira ha era ina sdrema d'argien. Mintgin da nus sto anflar quella sdrema tenor sias cundiziuns e situaziun. Sche nus partin nossa carezia in cun l'auter s'augmenta quella e sche nus partin nossa tristezza daventa quella pli supportabla. Ussa partin nus comunablamein nossa tristezza cun tut la carstgaunadad e sperein che quella crisa varghi ton pli spert.

Tgei savein nus far en quella situaziun? Biars da nus san nezegiar quella crisa sco pusseivladad da rinforzar quei temps el ravugl dalla famiglia quei ch'era forsa buca il cass avon muort l'occupaziun quotidiana. Avon nus stat in temps per sedar giu culs affons ed il rest dalla famiglia. In temps per leger eventual cudischs e per reflectar sur dil senn da nossa veta. Nus savein schizun ademplir caussettas sco per exempel: tedlar la damaun il cant dils utschals, admirar la bellezza da nos cuolms cuvretgs cun neiv ni selegrar dil ramurem d'in dutg ni flum.

Sch'ei dat en nossa famiglia carstgauns attempai ch'ei persuls ed isolai sche prende il telefon e dei mintgadi ina paterlada cun els. Entuorn nus sesanflan carstgauns ch'ei mendus e ston sbatter. Lein porscher il maun a quels che han tema, ch'ei trubistgai ed oravontut a quels ch'ei malsauns denter nus. Nus astgein rugar Diu, renovar nossa amicezia e setener ensemen en nossa rumpeivladad. Sch'ei sedat la pusseivladad da segidar cun concarstgauns che basegnan nies sustegn, seigi quei emoziunal, spirtal ni schizun financial, ei quei il dretg temps.

Duront che biars da nus han ussa liber ed han pauc da far, ein numerusas personas sco miedis, tgirunzas, personal da tgira, emploiai socials e publics sut squetsch ni luvrai giu. Els drovan nossas oraziuns e sustegn per ch'els possien ademplir lur grev pensum cun sentiment en quei temps da miseria e cheutras survir al beinstar public.

Dieus ha mai bandunau nus ed accumpogna nus adina, schizun en quei temps nunusitau. Laschei sesalzar nies cor viers Diu che dat a nus la forza necessaria che nus duvrein. Uss ei il temps arrivaus dad augmentar nossas oraziuns ed unfrendas per la carezia viers Diu e nos vischins. Lein esser solidarics cun nos frars e nossas soras cheu e sigl entir mund ch'ei malsauns. Lein far oraziun per quels che han piars lur carezai entras quei virus. Dieus consolesche els e regali ad els la pasch.

Sco finiziun vi jeu sincerar a Vus ch'jeu cumpegliel Vus mintga di en mias oraziuns ch'jeu fetsch en ina stanza privata ni en ina caplutta. Jeu celebreschel mintga di privat allas 19.00 uras la sontga messa ed urel per Vus tuts. Vus saveis seunir spirtalme in cun mei duront quei temps. Sespruei dad assister alla sontga messa sin televisiun, internet ni radio e da retscheiver spirtual la sontga communiun. Nus enconuschein la vera valeta dils sacraments per lu cu els mauncan. Quei temps varga era ed en in per meins essan nus puspei presents cun nos survetschs spirtuals en vischnaunca. Sogn Francestg d'Assisi ha inagada urau: «Dieus schenghegi a mi la ruasseivladad dad acceptar la caussa sco ella ei, la quala jeu sai buca midar e la curascha da midar la caussa che jeu sai sco era la sabientscha dad enconuscher la differenza.»

*Ludaus sei Jesus Kristus, semper sei ludaus. Amen.*